

閩都記卷之二十二

郡西北侯官勝蹟

郡人 王應山 纂輯

萬安橋折而西爲聞政橋通谷靈光橋黃洽墓李綱墓姚  
銑墓石岳山芋原驛林熾墓桃源井鄭穆墓

聞政橋一名文振在萬安橋西有亭其上柱皆石其下低田不  
通江潮

通谷在聞政橋南其下巖窠多奇勝若桃源笏石奇峯仙冠石  
紫巖亭高潔臺越王亭一線天六華巖稱十八景宋潘昉廷  
堅未第時讀書於此 明徐燧遊通谷洞小徑斜通谷躋攀

卷三

求放心齋

及晚晴草荒尋鳥道磴險作蛇行暮色千峯合春流一鏡平  
石間題舊刻半是紫苔生 林燾通谷歌奇峯笏石桃源東  
團團青松崎長空越王亭榭負靈敞石牀迢遞隣崆峒六華  
巖頂擁飛雪采芝山人授真訣紫巖千丈接青天尋真到此  
稱奇絕翠濤鬱葱俯危岡宛如道流濟冠裳長天縹緲通一  
線遙青厯亂列千嶂夷齊當日號清聖萬古相傳一何盛此  
地孤高數首陽昔人芳蹟垂佳詠清泉百道足飛觴屋曲澗  
迴遶石梁記取谷中幽勝處層臺高潔摩穹蒼 曹學佺遊  
通谷洞山行不覺暑爲入洞門幽藥澗微風度松濤亂影流  
嶂猿聲外雨野鶴夢中秋況與鄉園近無勞託卧遊 徐燧

次石馬卧斜曛松聲咽水濱危橋斜度月邃谷暗藏雲骨自  
何年朽名猶異代聞豐碑頽折盡留得掘餘墳

靈光橋在溪口舊靈光寺傍俗呼桐口水急善崩屢砌屢圯行  
者苦之 國朝萬曆六年重建爲亭其上

黃洽墓在靈光山洽字德潤隆興初進士第二累官叅知政事  
卒贈金紫光祿大夫嘗云吾有四不欺時論推重

李綱墓在十九都大嘉山由桐口入里許綱宋丞相主議恢復  
謫提舉洞霄宮僑寓福州卒葬於此

墓爲唐祥晏  
祖師塔墓

姚銑墓在桐口山銑字孟聲永樂進士正統初兵科都給事中  
死土木之難衣冠塋焉同時死事有陳鈍周傑並戶部主事

卷三

二

求放心齋

石岳山在岳江濱 懷安縣治在焉其山秀拔其石高廣坦平

其江滙五馬三洲之勝山有越王亭志載岳石歲覺增長亭  
今傾圯石亦不知其處 宋朱子詩春日江中注我行遡其

波揚帆指西逝兩岸青山多青山自透迤飛石自差峩綠樹  
生其間幽鳥鳴相和寒蓬騁遐眺擊楫成浩歌獨語無人晤

茲懷竟如何 停驂石岳館解纜清江濱中流棹歌發天風  
水生鱗名都固多才我來友其仁茲焉同舟濟詎止胡越親

相期豈今夕歲晚無緇磷 明王應山詩石岳標奇蹟齋居  
離垢氛碧流淹片月朱巘吐晴雲蓬島瞻鰲極沙堤數鴈羣

虹橋垂照耀烟市散氤氳通谷傳幽意吟臺對夕曛漁吹江

笛晚樵唱野亭曛掃逕遲三益開樽詠五君所餘南畝樂爲  
謝北山文

芋原驛在石邑江頭南行以輿北以舟皇華使節往來絡繹

察院行署在驛之北 遞運所在驛之東驛距水口百六十

里 明吳國倫發芋原驛迴舟芋原浦落日大潮生雪滿窗

中與天懸海上城山川含殺氣風雨入秋聲獨有孤雲色能

懸萬里情 又發芋原至水口金鎖江頭春水懸暮雲遙盡

海南天孤帆背指三山發只似浮槎過日邊 桃花落盡海

門春烟水茫茫又問津一夜棹歌聲不斷萬山愁殺未歸人

車大任初至芋原驛驛路依山畔州城接海濱却從三伏

卷三

三

求放心齋

暑猶見八閩春樹密臨風靜花繁帶雨新潁川何事業俯首

愧前人

林嫌墓在芋原驛後舊縣城隍地嫌廷機之子南京禮部尙書

贈太子少保謚文恪有司營葬

桃源井在桃源山下其水常溢雖亢旱不少臧圖經云桃源井

半將軍石畔

鄭穆墓在北平里穆事行具文儒坊

由芋原驛而西爲黃石溪沙溪林廷機墓葛岐鋪陳塘溪

白石灘甘蔗洲馬仙宮靈峯寺陳湖館葉洋公館蒙溪白

沙驛大瀨鋪大目溪鐵纜橋五奇仙山永隆菴丁山雪峯

寺

黃石溪卽石岳江上流也源自分水關至白沙合流七十里入西峽江

沙溪源出分水關經建劍而來下至芋原與大江合中有沙壅成洲故名

林廷機墓在沙溪山有司營墓庭機瀚之季子南京禮部尙書贈太子少保謚文僖

葛岐舖俗呼蟛蜞上通鐵嶺下通桐口

陳塘溪源出懷安十四都縈紆至此入江歲旱則堰石爲埧溉民田三千頃餘舊有橋橫其上今廢

卷三

四

求放心齋

白石灘在陳塘溪西巨石嶽岑江流迅急上有神祠樹木蓊鬱明徐勣舟次白石灘停橈白石下灘響浪花中畚舍秋烟黑漁舟夜火紅柴門喧月犬荻浦叫霜鴻賽社聞撾鼓應知歲又豐

甘蔗洲在十五都宋時有砦設巡檢司置戍焉今草環洲以居千家種樹藝圃地產橄欖向時種甘蔗爲糖故名其洲今無明王恭甘蔗洲北風吹長林林下白日曉黃茅繚洞少人行萬磧千峯絕飛鳥玉盡山中霜正繁長裾短策扣君門榜欄巷裡人烟僻蔗葉籬中雞犬喧君家結搆連雲起樓上青山下溪水溪水東流竟不回野花林路長蒼苔澗中落落青

石小谷口矐矐錦樹迴知君久負青囊秘前代楊曾共流輩  
山北山南得墓多白壁黃金買無地巾屨長留懶出山姓名  
那得滿人間灤河易水不堪聽鍾阜龍盤猶可觀

馬仙宮在甘蔗洲祀馬仙宮前有井歲旱不竭宮之北有五顯  
廟

靈峯寺在三十五都宋慶厯間建今廢又有歸宗萬迴廣福翠  
峯諸院竝廢 明馬欵詩但聞鐘磬音寶地隱山岑石塔生  
青草經壇引綠陰逢僧休問臘聽梵自觀心一點琉璃火夜  
來風雨深

陳湖舖在陳店洋上通葉洋下通鐵嶺先時有公館今廢

卷三

五

求放心齋

葉洋公館在葉洋舖 國朝萬厯十年建

蒙溪在三十四都源出連江縣界溪口有橋去白沙驛五里許

白沙驛在三十四都下通芋原六十里而近上通水口百二十

里而遙 明劉基發白沙至水口夜發白沙驛停午到水口

中流鬱風霧密雨蔽原阜溟濛蛟龍過隱隱怒雷吼傾欹卧  
帆席憑翼或前後畏途生頃刻顛倒亂足手蒼皇投山館喜  
懼劇紛糾攝身整衣帶沾濕及肩肘平生厯道路艱危頗曾  
受未能外形骸豈敢輕衰朽捐軀匪成人垂堂不宜徃總轡  
登前嶺烟雲尙昏黝經阻有虞防姬文亦奔走

大瀨舖在三十三都上通松嶺下通白沙

大目溪在三十二都沿溪以裏數十里有路達於雪峯 宋李  
彌遜大目溪詩造物隨人意輕帆百里間舟痕風力健客枕  
櫂聲閒山合塵蹤斷秋高爽氣還望州相見處鷲直透三關  
鐵纜橋在大目溪豐濟潭上相傳潭中有龍興則暴雨漲溪衝  
梁突岸乃以鐵纜繫其橋上鑄鐵佛遂不爲患

五奇仙山在三十四都山有五石秀聳怪奇相傳有仙居之山  
下有鎮國寺唐中和元年建今廢

永隆巷山在三十都上有玉几峯秀麗可愛宋開寶元年吳越  
錢氏建寺今廢

丁山在大目溪上十餘里路通雪峯山形如丁字故名又有小

卷三

六

求放心齋

坪大坪俗呼太平庄也 明徐爌宿馬氏太平山庄層巒歷

盡忽平田墟里鷄鳴見暮烟遠寺霜鐘千嶂月隔溪雲確百  
重泉年豐愈識山居樂秋至先輸井稅錢瓦枕蘿裯孤夢穩

夜深松籟又驚眠 謝肇淛次竹籬秋露豆花殘爲愛幽人

問考槃路轉亂峯孤鶴逕門臨野水一漁竿平田黃犢歸村  
晚落日蒼龍遠屋寒半夜溪聲滿牀月不知身已宿雲端

雪峯寺在二十八九三十都之中宋嘉祥東里也其山舊名象  
骨峯高四十里根蟠四邑未冬或雪盛夏無暑唐乾符間僧  
義存者至武陵傳法於五祖德山還闍居芙蓉山石室其徒  
蝟集於是得象骨峯里人謝做輩誅茅爲菴於涼暎臺北迎

存來住一日登山巔遇雪留宿其上因名雪峯其徒益盛至  
無所容乃去菴三百步經營建寺里人藍文卿舍田七千餘  
畝房室五百間諸物稱是遂爲南方叢林第一賜號真覺有  
鳳凰岡雪峯主山也梯雲嶺其巔險峻若登天然

烏石嶺在山之巔應潮泉水纔數寸進退深淺與潮候無差相  
傳爲海眼鰲山閣識成道之由枯木菴外嵌中枵真覺宴坐  
其間今猶宛然留香堂嘗有僧敗絮百結臭裂不可近僧衆  
逐之獨隣榻僧相留旣去數里謂荷君意勤適留香相浣比  
還所坐處異香襲人經時不歇又有乘雲臺無字碑難提塔  
卽義存真身塔存有識云石卵爆盡吾當復生至國初宣德間石

卷三

七

求放心齋

卵已爆寺宇重興云望州亭卧雲臺鞭門石文殊臺白雲臺  
月池湯泉虎迹石皆奇勝宋太平興國中賜號雪峯崇聖禪  
寺義存嘗驅木偶人轉輸糧食自題水磨云菴前永日無狼  
子磨下經年絕雀兒至今猶然院旁舊有古杉二株一義存  
植一閩王審知植今皆不存祖師木毬今在寺中無字碑  
古偈云一片如屏紫翠間風吹日炙蘚花斑莫言箇裏無文  
字爲待高人著眼看元劉弇贈雪峯長老守超仰窺玉奩  
天面容頑碧顛青自天擲祖師不管地祇慳千五百徒此其  
宅流水聲中換今昔粉抹頰糊老椽壁枯木菴回舊日春難  
提塔示重來折超公最後法席張全機撲落混毬場曾令天

不飄墜況有庭橘符青黃烏藤橫膝傲佛祖熟識眉宇瞬  
且揚天吳吹瀾洗霾垢方諸挹月來清涼東甌萬剎盡金布  
昨舌誰堪論妙悟贈教參兒走衲雲高枕無乃林泉負廬峯  
南遠真西材叩寂丈室慙宗雷秀顛龐眉遍人爽反疑不自  
塵中來由來山興復不薄畏途何計揮塵縛詰朝走馬汗羞  
顏又作楊花無止泊 明唐泰遊雪峯微霜落葉渡關河古  
寺深秋掩薜蘿輕策獨隨飛鳥去好山偏向夕陽過三花祇  
苑逢僧少獨樹空林積雨多暫盍朋簪耽勝果下方塵土易  
蹉跎 王恭雪峯歌送雲上人七閩山多如蜀川千崖萬壑  
疑登天六華峯歆雪作頂五月夜半聞寒蟬芙蓉石窄人飛  
過蓮宇經臺尙經火無字碑橫任鹿眠磨香石冷從猿卧憶  
昨法園初布金三千緇錫遶叢林經行龍象諸天影禪寂蛟  
鼉萬籟音杉枝青青低覆地木人也悟西來意五百年光轉  
眼休重見真僧出凡世鐔津法侶解楞伽却下九峯登六華  
枯木菴前掛如意留香堂上搭袈裟羯來下界相逢處幸接  
微言沃甘露鑿齒由來識道安遠公自是奇元度法舟今去  
幾時逢塵世空瞻象骨峯歸見住山相問訊西江一派是禪  
宗 高廷禮送雪峯寺僧龍淵新將半偈出青蓮孤鶴閒雲  
思渺然金錫來承天漢語紫衣歸坐雪峯禪尋鐘野寺殘山  
外漱齒寒流落照邊行至東林休結耐松枝已偃舊房前



葉向高遊雪峯嶂日太凌嶒炎天散鬱蒸峯寒猶帶雪逕仄  
半垂藤卧病君恩隔安禪世態憎留連不能去覺路尙堪乘  
招提開寶地振錫自何年繡柱圍蒼蘚虛廊響瀑泉布金  
人已去說法樹空傳辛苦催租吏豪門半寺田 青山看欲  
遍茲地喜初遊洞古松杉翳堂傾鼠雀愁法雲時作雨僧臘  
不知秋分得伊蒲供還爲信宿留 存公振宗教遁跡到茲  
山枯木猶藏鉢經年只閉關斯人不可作流水自潺湲一脫  
微名累超然心境閒 徐勣遊雪峯寺踏遍危巒翠靄重寺  
門金榜署唐封三冬積雪埋孤嶂百尺春潮戰萬松石卵爆  
殘成讖緯木毬趯後露機鋒一輪皓月方池照影出雲端象

卷三

九

求放心齋

骨峯 路入雲邊少客來翠微深處竹房開斷碑歲久磨無  
字古鏡塵空掛有臺鐘爲缺餘唇嚙土井因智後幕生苔佛  
田一半歸豪主誰捨藍家長者財 謝肇淛遊雪峯古刹高  
臨象骨峯客來下界已聞鐘搖空塔影依雙樹捲雨濤聲吼  
萬松百里遠山皆貼地四時積雪盡成冬木毬不動香臺冷  
猶有殘碑蘚未封 一從飛錫亂峯巔寶地香燈七百年水  
轉山田無雀耗雲歸石洞有龍眠窻前池蘸干林月海外潮  
通半壑泉勝事只今俱寂寞殘經空鎖講堂烟

渡大目溪而西爲松嶺鋪白沙新驛張聖廟崇壽寺雙髻  
峯湯泉院梅埔山小箬驛仁溪

松嶺舖在大目埕上通湯池下接大瀨邇歲置戍江防泊舟於此

白沙新驛在松嶺舖之東 國朝萬厯十年以白沙驛距水口遼遠茲爲土中集議規建東爲公館西爲承解移舊驛於此然人烟稀少夫役多缺復歸舊驛

張聖廟在新驛之西鄉人規建以完形勝俗呼爲佛堂張聖具閩清演溪

崇壽寺在三十四都宋開寶七年建今廢

雙髻峯在二十四都小箬溪之水出焉山巔有鰲峯嶺下有湯院石在土中間人掘取供玩唐咸通初僧師復與林衮業儒

卷三

十

求放心齋

同入關至楊子渡江師復有出塵之想賦詩而歸卜築雙髻峯下以山形險峻移綏平里宋梁克家三山志總敘三山列雙髻之勝 宋黃幹雙髻峯萬山環立兩山高伯仲壘篴風味多軒冕直能驚俗子采薇千古不消磨

湯泉院在雙髻峯之麓距雪峯寺八十里有溫泉焉僧可遵嘗作偈直待衆生塵垢盡我方清冷混常流宋蘇軾賞之有曾顰程師孟蔣之奇諸公留題冠蓋南北多憩於此 宋李綱溫泉溫冷泉源各自流天教施浴雪峯陬衆生塵垢何時盡日日人間幾度秋 玉池金屋浴蘭芳千古華清第一湯句似此泉澆病叟不妨更入荔枝鄉

梅埔山在二十五都界侯官閩清二邑舊志潭中有鐘莫知年代唐貞元中僧惟亮欲取之見蛟龍出沒遂不敢近

小箬驛在小箬溪口今廢又大箬距驛五里竝濱江多人烟

明陳翰臣小箬溪作清溪望不極秋色佳有餘落日映空山

孤雲流太虛俯鑒波底徹帆影驚遊魚兩岸亘空濶遙愛林

木疎人家古木陰雙雙接茅廬天長鴈鶩少境曠心神舒我

本澹蕩者生計憑樵漁願辭城市氛茲焉託幽居 謝肇淛

夜泊小箬溪作小箬溪邊秋水生野帆如葉暮雲平傷心望

盡江南路月滿蘆花鴈一聲

仁溪在二十五都源出連江縣界溪以西爲古田縣地